

Ehuhuo-Ozi Polu Dejenni

Ndi Rom

¹ Mmẹ wu Polu de ekukwo-ozini. M wu igbon Jizos' Kraisti. Osolobue kpo m, tumẹ m onye-ozu pu-ichen make Ozioma Osolobue.

² Oziomanị wu banyeni ihien hun Osolobue kwe nkwa a edei ime Ehuhuo-nsọ ghahani ndi-amuma a. ³ Oziomanị wu banyeni Nwa a wu Jizosi Kraisti Di-nwonna-enyi—hun bia nọke ihian; ebon Defidi ke we mu a ye; ⁴ Osolobue gi iken Mmon-nsọ a ghosizikwo n'ọ wu Nwa Osolobue ghahani igha onwun weli e.

⁵ Make ufiri efan Osolobue, Osolobue e meguoni enyi efoma ghahani Nwa a ni wu Jesu Kristi Di-nwonna-enyi; o yeguzi enyi orun ndi-ozu pu-icheni ghahan'a, keni enyi hun uzọ duhe ndi ali ndi ozo ile wuleni ndi Ju d'e kwerin'e, humen'e isi; ⁶ kezi unu le enwen unu, makeni we kpozikwo onu d'a wuru nke Jesu Kristi. ⁷ M'ri e dejenni ndi ile ri Osolobue obi hun ri Rom, ndi we kpo d'a wuru ndi-nsọ. Efoma le udon gha eka Osolobue Nedi enyi le Di-nwonna-enyi wu Jesu Kristi a bia ya rini unu.

Polu A Kpanmin Osolobue

⁸ Nke ibuzo, m ri a kpanmin Osolobue m ghahani Jesu Kristi make unu ile, makeni we ri e ku oku okukwe unu ime uwa ile. ⁹ Osolobue, hun m gi obi m ile e fe ghahani izisonme ozioma Nwa a, wu osheri m ni m'a nyanhan unu ogen ile ime ekpere m. ¹⁰ M gha e me ekpere, m'a risonme Osolobue n'o beye ni m oghere ni m saeka bia nwan d'a hun onu—omeni uche e ro. ¹¹ Makeni unu ri a da m—makeni m cho ni m yebeye unu ngozi ime-mmon,

keni unu zekenme. ¹² Mba, keni mme le unu hun uzọ gi okukwe enyi gbatari ibe enyi ume.

¹³ Umune m, m cho ni unu marin n'o teke m choma ni m bia d'a hun unu. (Kani we eke ni m bia.) M ri a cho ni m bia, keni m gha ime unu kpohazini Osolobue ihian ke m don me ime ani ndi ozozu wuleni ndi Ju. ¹⁴ M gi ihian ile ugwo: ke ndi wa-enya ke ndi waleni enya, ke ndi jen ulo-ehuhuo ke ndi jenleni— ¹⁵ ya hain o gi a du m ni m bia d'e zizikwo unu ndi ri ime Rom' Ozioma.

Iken Ri Ime Ozioma

¹⁶ Ifenren ozioma ari e me m, makeni ya wu iken Osolobue gi a zuopuha onye owule kwerini, ndi Ju wu ibuzo, o son ndi wuleni ndi Ju. ¹⁷ Makeni, ozioma ya nwe a ghosi ke Osolobue don e me ihian a wuru onye ri ke Osolobue cho: o me e ghahani okukwe onye ahun—gha mbidon d'e ru njendeme. O nohu ke Ehuho-nsọ don ku e, si, “Onye ri ke Chuku cho ghahani okukwe k'a ri ndun.”

Ikpe Hun Ma Ihian Ile

¹⁸ Iwe-le-onuma Osolobue a gha elu-igwee e hukwasi njo ile le ihien ile rileni mma hun ndi-eje e me, ndi hun gi eje-ihien we e me e gbondon ezioku.

¹⁹ Makeni, ihien ihian k'a saeka marin banyeni Osolobue we we enya, makeni Osolobue le enwen e e meguo n'o we we enya. ²⁰ Makeni, kete Osolobue e kele uwa, iken-itebite Osolobue le ihien o gi wuru Osolobue a fuhachanringuo ifon. Osun'a ni ele we ihien we e legha enya, we e gi ihien ndi hun Osolobue ke a ghota we, a hun ke we no. Ya wu, o nwonni ihien ndi no erira k'e kin, dodo arikonu we ya, kaka! ²¹ Makeni, osun'a ni a maringuo we Osolobue, eyeni we e mgbaye run'e, akpanmini w'a. Kama, iroro we a wuru ihien olal'iwu, uche we hun ghazileni a run a gbaguo ishi. ²² Ebe we ri e ro ni

wę marin ihien, e henrin wę ndi-nzuzu; ²³ hun nke w'e gi fe Osolobue hun ghaleni a nwun, ye e ogho run'e, e fesonme wę ihien wę kpu akpu—ke ndi no ke ihian hun a nwunni ke ndi no ke anu ri ichen-ichen, ke anu ndi nwe uku-enọ ke nnunu ke ihien ndi hun a rin!

²⁴ Osolobue no gi ifiri eje-ihien ndi ahun ri a gun wę ime obi la wę toni imesonme ihien ru unyin—wę le ibe wę no gi ehụ wę mesonme ihien-ifenren; ²⁵ wę no gi ntụ nokin enya ezioku Osolobue, fesonme ihien Osolobue ke, a kpo ni wę isi-alị hun nke w'e gi fe Osolobue hun wu Onye-okike hun richanrin mma jenrin ejen! Isee.

²⁶ Ufiri onwan, Osolobue no la wę toni egun ihien-ifenren, nke wu ni ikpoho wę e gi ime-mgba ikpoho-le-ikpoho ihian ghaleni e me, nokin enya ime-mgba ikennyele-ikpoho hun o me ni ya ke ihian e me. ²⁷ Erira ke ikennyę wę gizikwo lato ime-mgba wę le ikpoho hun ihian e me, egun ison ikennyę ibe wę e me mgba hu a gungbu wę; ikennyę le ikennyę ibe wę hu e metari ihien ifenren—a narinzikwo afunfun furu eje-ihien wę ri e me.

²⁸ Makeni ndini ju ni eyeko wę Osolobue onodi wę marin run'e, Osolobue no la wę toni uche wę ahun runi keni wę mesonme ihien furuleni. ²⁹ Udi ihien ile jo-njo e jun ime wę, ya le eje-omume, enya-uku, iwe, enya-ufu, igbu-ochu, ikpe, ndufie le ero; e henrin wę ndi-oghela, ³⁰ ndi-nkuto, ndi ize Osolobue e ze; w'a kpari ihian, a pache, a nyan isi, e ropuhasonme eje-ihien rituleni, e nupu-isi okpuru ndi muni wę. ³¹ E nwe wę uche, w'a ra gi wę don enya, efo a joka wę, w'a ra me ebere.

³² A maringho wę ni iwu Osolobue wu ni ndi hun e me udi ihien ndini k'a nwun, kani wę huzi e me wę—eledę ni wę e me wę suo, wę huzi e ye ndi ozọ ri e meni wę ndu.

Isi Nke Ebuo

Okinkin-ikpe Osolobue Zin-ezin

¹ Ya wu, y'e nwonkwọ ihien i k'e kin—onye owule i wu! Makeni, ebe i no ma ndi ozọ ikpe, i ri a mazikwo enwen i ikpe. Makeni, iyu hun ri a ma we ikpe rizikwo e me ihien ndi hu i gi ri a ma we ikpe. ² Enyi a maringho ni Osolobue wu onye ezioku ebe o no ma ndi me udi ihien ndini we ikpe. ³ Kani, iyu nwen, onye owule i wu, hun e mezi ihien ndi hu i gi a hangbu ndi ozọ enen, i ro n'i k'a wanahin okinkin-ikpe Osolobue? ⁴ Ra i ri e lelia oken efoma a le nkintin o ri a gba i le ndidi e? Y'a marin ni Osolobue ri e meni i efomani keni i hun uzọ roghari? ⁵ Kani, ebe i n'a kpokin obi i, a ju ni y'e roghariko, i ri e kpontọ ni enwen i afunfun, e cheni afunfun, hun we jenko d'e ye i Uhuohin iwe-le-onuma, uhuohin hu Osolobue k'e gi han enen ahun zinrinni.

⁶ Osolobue k'a ku onye owule ugwo ke onye-onye don run. ⁷ Nke ndi hu e mesonme mma, makeni we ri a cho ogho le mgbaye le ndun nwonleni ogugu, Osolobue k'e we ndun itebite ye we. ⁸ Kani, Osolobue k'e hu iwe-le-onuma a kpu ndi hun a cho nke-we nke-we, a ju ezioku, e son eje-ihien. ⁹ Eje-ufu le nsongbu k'a rini onye owule hun e me eje-ihien, ndi Ju wu ibuzo, o son ndi wuleni ndi Ju.

¹⁰ Kani Osolobue k'e we ogho le ikpen le udon ye ke we han hun e me ihien ri mma, ndi Ju wu ibuzo, o son ndi wuleni ndi Ju. ¹¹ Makeni Osolobue ara gbeyeni onye owule.

¹² Ndi wuleni ndi Ju enwon Iwu Mozizi; kani we me njo, a na we iwi, osun'a ni enwon we Iwu Mozizi. Ndi Ju nwon Iwu Mozizi; we me njo, e gi we Iwu Mozizi kin we ikpe, ma we ikpe. ¹³ Makeni ele ndi a nu ihien Iwu ku ke Osolobue e kuni ohunma, kani, ndi e me ihien Iwu ku. ¹⁴ Omeni ndi hu wuleni ndi Ju, hun nwonleni Iwu Mozizi, e gi omume

wę mę ihien Iwu hu cho, e nwegho wę iwu ime obi wę, oson'a ni enwon wę Iwu hu ke ndi Ju don nwe e. ¹⁵ Wę ri e gi omume wę a ghosi ni ihien Iwu cho a wurule ihien wę deye ime obi wę. Ihori wę hu a shia ni wę eri: mgbe ndi hu iroro wę a ma wę ikpe, mgbe ndi hu o kuyeni wę. ¹⁶ Eriira k'o jenkọ d'a ri Uhuohin ahun Osolobue k'e gi gi ihien zueri ime obi ihian kin ihian ikpe ghahani Jesu Kristi, nọke ke Ozioma hun m ri e zi don ku e.

Ndi Ju Le Iwu Mozizi

¹⁷ Kani, i si ni i wu onye Ju; e gi Iwu Mozizi e don enya, a nyan isi ni egbata yu le Osolobue a rika mma; ¹⁸ a nyan isi ni y'a maringho uche Osolobue, marin ihien ka mma —n'e gigo wę Iwu Mozizi zun i; ¹⁹ i si ni i wu onye e du ndi enya-ishi, n'i wu ukpe ndi ri ime ishi, ²⁰ ni i wu onye a dun ndi nzuzu odun le onye a kuzi umueka—n'i nwon amamihien le ezioku zu oke ime Iwu Mozizi. Ele ya?

²¹ Ya wu, iyu hun a kuzi ndi ozo, i hu a kuzi enwen i? I hu a si, “Ezunle ohin.” Kani yu nwen, i hu e zun? ²² I hu a si, “agherele;” Kani yu nwen, i hu a ghere? I hu a si, “Aruale mmon, ni eje-ihien ro.” Kani yu nwen, y'e jen uno mmon d'e zun ihien rin'a? ²³ Iyu hun gi Iwu Osolobue a nyan isi, i hu a dan ya wu Iwu— e gi e a fa Osolobue? ²⁴ Ehuho—nsọ si, “Ufiri unu ndi Ju ke ndi ali ndi ozo gi e kuto Osolobue.”

Ikwa-ugun Le Ife-Osolobue

²⁵ Ikwa-ugun a bangho erere—omeni i hu a gbaye Iwu Osolobue. Kani, omeni y'e nupu-isi okpuru Iwu hu, ya wu ni ugun i kwa elezi ugun nke-esi. ²⁶ Ya wu, omeni ndi kwaleni ugun e me ihien Iwu ku, e weriko wę wę nọke ndi kwa ugun—o sọ n'a ni akwanni wę? ²⁷ Ya wu ni ndi kwaleni ugun nke ehụ, bu wę hu e donme Iwu hu, k'a shiagbu unu eri—makeni onu a dan Iwu hu, oson'a ni unu ke wę detun'e, oson'a ni unu a kwago ugun.

²⁸ Makeni, ele ihien enya e legha ke ihian gi a wuru onye Ju; ezigbo ugun ele hun we kwa ehụ, w'e legha enya.

²⁹ Mba. Kani, ezigbo onye Ju wu hun wu onye Ju ime obi; ezigbo ikwa-ugun wu hun we kwa ime obi—ihien ime-mmon le Mmon-nso ro, ele ihien ehụ le mkpuru-oku we dehụ ime. Udi ihian no enina k'a narin ija-mma we aka Osolobue ele aka ihian ibe e.

Isi Nke Eto

Ki Ndị Ju Gi Ka Ndị Ozo Mma?

¹ Ki ndi Ju gi nwan ka ndi ali ndi ozo mma? Elee erere ke ikwa-ugun banzi? ² O bukekwo! Nke ibuzo wu ni Osolobue bu oku gha a onu puha che aka ndi Ju.

³ Kani, omeni o nwego ndi ri ime we wuleni ndi we gi e don enya, ni enyi gi ohun si ni Osolobue ele onye we e gi don enya? ⁴ Mba, kaka! Osolobue wukwo onye ezioku, o suon'a ni ihian ile wu ndi-ntu. O nohu ke Ekukwo-nso don ku e, si,

“We k'a hun a

ni ihien i ku wu ezioku;

we kin i ikpe, i k'e ri enen;

i han enen,

w'e k'a hun ni enen i han wu ezioku.”

⁵ Kani, o me nwan ni eje-omume enyi a ghosi ke Osolobue mehan onye ezi-omume, ki enyi e ku nwan? Ni enyi si nwan ni Osolobue me njo omeni o ye enyi afunfun? (M ri e ku e hu ke ihian don e ku.) ⁶ O nwonna k'o don me! Makeni, omeni Osolobue wu onye njo, nani k'o k'a don kin uwa ikpe? ⁷ Kani, omeni ntụ m ke ezioku Osolobue gi a fuhachanrin ifon, e wehen'e ogho, ke w'a mazinị m nwan ikpe ni m wu onye-njo? ⁸ Ki hain enyi gileni si, “Ni enyi mesonme nwan njo keni ihien ri mma hun uzo a puha

ifon”? (Ya ke ndi ri e kuto ni enyi si ni 'ya ke enyi e ku.)
We furu ndi w'a ma ikpe.

Onwonna Onye Ri Ke Osolobue Cho

⁹ Ki mezi? Enyi ndi Ju ka ndi hun wuleni ndi Ju mma? Kaka akp'ohu! Enyi e kugool'a ni njo ri a ki ihian ile—ke ndi Ju ke ndi wuleni ndi Ju. ¹⁰ Erira ke Ehuho-nso don ku e, si,

“O nwonna onye ri ke Osolobue don cho,
o nwondeni kaka akpu onye ohu;

¹¹ O nwonna onye a ghotani,
o nwonna onye a cho Osolobue.

¹² We ile a kpahugo;
we ile e henringuo ihien-eti;
o nwonna onye e me efoma,
o nwondeni kaka akpu onye ohu.

¹³ Oku a gha we ekpiri a puha ri ke
ishin gha ili ri oghe a puha;
we gi ire we e dufie,
edide agwo ke
oku ri we ugb'onu wu.

¹⁴ Ikpo-iyi le eje-okun we onu.

¹⁵ Uku a kereka we igbu-ochu.

¹⁶ Ebe owule we jen,
we le ntikpo le nsongbu wi.

¹⁷ Amaritudeni we ihien ezigbo udon wu.

¹⁸ Egun Osolobue aride we enya.”

¹⁹ Enyi a maringho ni ihienni ile Iwu ku, ni ndi ri okpuru Iwu k'o ri a gwa, keni onu owule gba nkintin, ken'o wezikwo ihian ile ri uwa ile enya ni we ile jenkwo d'a ko ni Osolobue ke we jen. ²⁰ Makeni, “O nwonna onye Osolobue k'e kuni ohunma makeni o n'e me ihien Iwu cho,” makeni Iwu ke we gi e me ihian a marin ni ihian e meguo njo.

Kẹ Ihian A Dọn Rị Kẹ Chuku Cho

²¹ Kani Osolobue a ghosiguo uzọ ihian gi a rị ochan—bu ele ghahani Iwu Mozizi. Kani, ke ime Iwu Mozizi ke ime ihien ndi-amuma ku, Ehuhuo-nsọ a shiaguo eri ni ya wu uzọ ke ihian gi a rị ochan.

²² Uzoni hun gha aka Osolobue bia, hun we e gi rị ochan, wu ikwerini Jizos' Kraisti.

Onye owule kwere, Osolobue e weri e n'ọ riguo ochan—o tuni onye we wu. Makeni, o nwonni ihien rị ichen ime ihian ile, kaka, ²³ makeni ihian ile e meguo njo, gha ime ogho Osolobue danfu. ²⁴ Ya wu ni efoma Osolobue suo ke Osolobue gi nwan e kuni ihian ohunma—ihien-ofe ro. O me e ghahani igbarini we ghahani Kraisti wu Jizosi. ²⁵ Makeni, Osolobue we Jesu ye, gi e henrin ejan we gi e wepu njo ihian le iwe-le-onuma Osolobue hun njo te k'e buheni ihian. Onwun Jesu nwun, ya wu edeke Jesu, ke Osolobue gi me e.

Okukwe ke we gi e nwehen ihienni Jesu me. Osolobue me onwan n'o gi ghosi ni ya le enwen e wu Osolobue wukwo onye ezi-omume—ndidi e k'o gi fepu njo ihian mesonme mbu enya— ²⁶ makeni o kwadem e n'o k'e gi ogenni ghosi n'ọ wu onye ezioku, n'o nwonni onye o gbeyeni. Osolobue gi uzoni a ghosi ni 'ya le enwen e wu onye ezioku, n'ọ hughozikwo mma n'ọ nabanhan onye owule kwere Jesu, kpọ onye hu onye rị ochan.

Osolobue Suo Me E, Ihian A S'eka Nyan Isi

²⁷ Kini ke ihian e gizi nwan nyan isi? O nwonni, kaka akp'ohu! Makeni, ele orun le ugwo-orun ke we gi e me e; mba, okukwe le ihien-ofe we e ye onye kwere ro—'ya hain ihien we e gi nyan isi gizileni rị a. ²⁸ Makeni, enyi gi e don ni ghahani okukwe ke Osolobue gi e kuni ihian ohunma, ele ime ihien Iwu cho. ²⁹ Makeni, Osolobue

wu ohu suo. Ra Osolobue ndi Ju suo rode? Elezi nke ndi wuleni ndi Ju? Eghee, o wuzikwo nke ndi wuleni ndi Ju, ³⁰ ebe o me ni Osolobue wu ohu suo. Ya wu, o k'e gi ifiri okukwe nabanhan ndi Ju, kuni we ohunma, gizikwo ifiri okukwe nabanhan ndi ali ndi ozo, kuni we ohunma.

³¹ Enyi rida nwan e gi oku okukweni a kagbu Iwu Mozizi ra? Mba, kaka; enyi ri e gide e a kwadon e.

Isi Nke Eno

Ebrahim Le Okukwe

¹ Ime oku okukweni, ki enyi k'e ku banyeni Ebrahim wu nedi enyi nke anu-ehu? Nani k'o jen?

² Omeni ihien hun Ebrahim run ke Osolobue gi kun'e ohunma, nke o nwon ihien o gi nyan isi, kani ele ebe Osolobue ri k'o k'a no nyan ya wu isi. ³ Ki Ehuhuo-nsoku? O si, "Ebrahim' kweyeni Osolobue, Osolobue no gi ifiri e gun a yen'e, kpo a onye ri uchan."

⁴ Lee e nwan: onye run orun, a ku w'a ugwo-orun a. W'a ra si ni we "ye" e ihien-ofe, kama, w'a si ni ihien o run ro, ni we ku a ugwo-orun.

⁵ Kani nke ndi hun gichanrin okukwe don enya, ele orun, e kweyeni we Osolobue hun a si onye njo n'o riguo nwan ochan, okweyeni we kweyeni Osolobue k'o gi e kuni we ohunma, a kpo we ndi ri ochan. ⁶ Onwan wu ihien Defidi ri e ku ogen o gi ku oku ighoghohu hun rini onye hun Osolobue weri e n'o wu onye ri ochan—bu o nwonni orun oma owule o run: o si,

⁷ "Ngosi arikakwo ni

ndi hun Osolobue gbaghari eje-ihien ndi we me,
ndi hun o fichanpu njo we;

⁸ ngozi arikakwo ni

onye hun Di-nwonni-enyi jenkoleni
d'a gun ni njo a!"

⁹ Onye nweede nwan ngozi hu Defidi ku oku e? Ndi hun kwa ugun suo ra ke ndi kwaleni ugun?

Enyi e kuguo a ni ufiri okukwe Ebrahim ke Osolobue gi kpo a onye ri ke Osolobue cho. ¹⁰ Elee onodi ke Osolobue node gun ihieni yen'e? Ebe o kwaguu ugun ra ebe o keleni kwa ugun? Ele k'o kwaguu ugun, kanj k'o keleni kwa. ¹¹ Osolobue no gi ikwa ugun ye e ahima, gi ghoji n'o ri-ochan, ya wu n'o riguole ochan ghahani okukwe k'o keleni kwa ugun—keni Ebrahim wuru nedi ndi ile kwerini kwaleni ugun; keni Osolobue gi ifiri okukwe we kpozikwo we ndi ri ochan. ¹² Ebrahim wuzikwo nedi ndi hun kwa ugun, ndi hun o me ni ele ni we kwa ugun suo, kama, we nwonzikwo udi okukwe ohu hu Ebrahim nedi-enyi nwon n'o d'a kwa ugun.

Okukwe Ke We Gi E Nwonhen Ihien Osolobue Kwe Nkwa A

¹³ Ogen Osolobue gi kwe Ebrahim' le umu a nkwa ni uwa k'a wu nke we, o kuni ni idonme Iwu ke Ebrahim mobu umu a e gi nwehen e, kama, ni igi okukwe henrin ndi ri ochan ke w'e gi nwehen e.

¹⁴ Makeni, omeni ndi hun e donme Iwu ke Osolobue e ye ihien o kwe nkwa a, ya wu o nwonni ihien okukwe wu—nkwa Osolobue enwon ihien o wuzi; ¹⁵ makeni iwele-onuma Osolobue ke Iwu e wehe we dan a; kanj ebe Iwu rileni, w'a ra dan iwu.

¹⁶ Ya wu, okukwe ke we gha e nwehen ihien ahun Osolobue kwe nkwa a, keni nkwa hu hun uzo wuru ihien-ofe hun Osolobue e ye ndi ile wu umu Ebrahim'—ele ndi we ye Iwu suo, kanj ke we han nwe okukwe ke Ebrahim' don nwe.

Makeni Ebrahim' wu nedi ndi ile nwe okukwe, ¹⁷ (noke ke Ehuhuo-nsa don ku e, si, “E meguo m'i wuru nedi ndi anj ri ichen-ichen bu oda.”) O wu nedi enyi ihun Osolobue,

onye hụn o gi dọn ẹn्या; Osolobue hụ hụn e me onye nwunni a rizi ndun, hụn e gi oku-onu a e me ihien rituleni n'o ri. ¹⁸ Ebrahim' no kweri, kwerikenme, a tu ẹn्या ni nkwa Osolobue jenkọ d'e me—osun'a n'o nwonni ihien ozọ o kwondon eka. Ya k'o gi henrin “Nedi ndi ali ichen-ichen bu-oda,” nọke ke Osolobue don gwa a mbu n'o k'a ri, si a, “Erira ke umu i k'e buhan oda.”

¹⁹ Okukwe Ebrahim ebelani, osun'a n'o nyanhangho ni ehụ a anwunhuguo (makeni o wu ihien nọke nwa ahua ogun-isen ogen hu), osun'a n'o nyanhanghozi ni Sara nwunye e wu agan; ²⁰ o nini obi-ebuo nu e d'a ru nkwa Osolobue uka; kama o zekenmede ime okukwe e, a ja Osolobue mma. ²¹ O kwerikenme ni Osolobue k'a s'eka me ihien Osolobue kwe nkwa a. ²² Ya hain Osolobue gi “gun a yen'e, kpọ a onye ri ochan.”

²³ Ele Ebrahim suo ke we de ni oku hu, ni, “We no gun a yen'e.” ²⁴ Kani, we dezikwo ni enyi nwen ya; makeni we jenkọ d'a gun a yeni enyi ni enyi a riguo ochan—enyi ndi hun kwerini Osolobue, Onye ahun gha onwun weli Di-nwonni-enyi wu Jesu. ²⁵ Osolobue gi ifiri njo enyi we Jesu ye n'o nwun, gizi ifiri enyi gha onwun weli e—keni Osolobue hun uzọ kuni enyi ohunma.

Isi Nke Isen

Enyi Le Osolobue E Donguo Nwan!

¹ Ebe o me nwan ni Osolobue e giguọ ifiri okukwe enyi kuni enyi ohunma, ya wu ni enyi le Osolobue e donguo ghahani Di-nwonni-enyi wu Jesu Kristi— ² onye hun Osolobue gha eka a gi ifiri okukwe enyi webanhan enyi ime onodin o me efoma ye enyi, efomani hun enyi wuzo nwan ime e.

Enyi ri nwan a nan make ni enyi nwon olil'enya ni enyi jenkọ d'a banye ogho Osolobue!

³ Enyi a nianzikwo a nian ime nsongbu ndi hun a biasonmeni enyi, makeni enyi a maringho ni nsongbu e wehe ndidi; ⁴ ni idisonme ndidi e me ihian a gunsonme agungun ri mma; ni igunsonme agungun ri mma e buhe olil'anya — ⁵ bu olil'enyani ekpuyeko enyi, makeni Osolobue nwe ihien-osusuo jenni enyi oda-oda—o huguo ihien-osusuo o nwe ebe enyi ri ye ime obi enyi ghahani Mmon-nsa a o ye enyi.

⁶ Makeni, ogen o gi richanrin mkpa, ogen hu ndun gileni ri enyi, Kraisti no nwun ni enyi ndi njo onwun.

⁷ O fuka orun ni ihian k'e gide ifiri onye ri mma nwun onwun—o suokwo n'a ni, ikenkwo, ihian k'e ri-eka rikin obi, gi ifiri onye rikenme mma nwun onwun. ⁸ Kanj Osolobue a ghosiguo enyi ke o nwehan ihien-osusuo enyi. Nani k'o don me e? Ebe enyi rikwo ime njo, ya ke Kraisti no nwunni enyi onwun! ⁹ Ebe o me nwan ni Osolobue e giguo ifiri onwun Jesu nwun, ya wu, ifiri edeke e, kuni enyi ohunma, enyi jenko nwan d'a wanahinchanrin iwele-onuma Osolobue ghahani 'ya wu Jesu. ¹⁰ Makeni, omeni ogen enyi gi wu ndi-inenren Osolobue, o gi onwun Nwa a donzi egbata enyi le ya, ya wu ni, hunni enyi le iya donguu, o k'e gi ndun Nwa a me enyi wanahinchanrin!

¹¹ Elede ohun suo, kanj, enyi huzi a nian ime Osolobue ghahani Di-nwonni-enyi wu Jizos' Kraisti, onye hun Osolobue ghaguu nwan aka a donzi egbata enyi le Osolobue.

Adam' Le Kraisti

¹² Ya wu, ke njo don gha aka okenye ohu wu Adam' banhan ime uwa, njo no wehe onwun, erirazi ke onwun don ru ihian ile aka makeni ihian ile me njo. ¹³ Eghee, njo ri ime uwa ni we d'e ye Iwu Mozizi; kanj, ebe iwu rileni, w'a ra si ihian “Lee njo i me.” ¹⁴ Kanj, o suokwo n'a ni o ri erira, onwun hukwo a kichanrin ihian ile, gha ogen Adam d'e ru ogen Mozizi—ke ndi hun danleni iwu owule

Osolobue kpọ efan ke Adam don dan iwu Osolobue kpọ efan.

Adam wuchanrin ihien we e leri enya a kowa onye hu keleni bja ogen hu—hun wu Kraisti.

¹⁵ Kani, we ebuo ele ohu. Ihien Osolobue ye ofe anoni ke njo Adam. Onwun ke njo okennyeh ohu hu wu Adam' buheni ndi bu oda. Kani, Osolobue gha efoma okennyeh ohu hu wu Jesu Kristi me menii ndi bu oda ohunma, ye we ihien-ofe—ele onwun.

¹⁶ Ozozi, ihien Osolobue ye ofe anoni ke ikpe-omuma hun njo okennyeh ohu hu wu Adam' buhe. Makeni, okinkin-ikpe ke we gi son akpu njo ohu, we no ma ihian ikpe. Kani Osolobue gi ihien-ofe son njo bu oda ihian mesonme, kun'e ohunma.

¹⁷ Omeni ifiri njo okennyeh ohu ahun wu Adam' me ke onwun gi ghaha aka a kima, kini k'e me ndi nabanhan oken-efoma Osolobue le ihien-ofe o ye hun wu iri-ochan? Ya wu ni we k'e nwon ndun, elezi onwun—we k'a ri ndun, ki hun we kpọ okiki—ghahani okennyeh ohu hu wu Jesu Kristi.

¹⁸ Ya wu, ke akpu njo ohu hu Adam me don buheni ihian ile ikpe-omuma, erira ke akpu ihien ri mma ohu Kraisti me don nwan e me Osolobue e kuni ihian ohunma, e we ndun e ye e. ¹⁹ Makeni, aka ohu hu ndi bu oda gi henrin ndi njo makeni okennyeh ohu hu wu Adam nupu isi, ya ke Osolobue sikọ nwan d'e gi me ndi bu oda wuru ndi ri ochan ebe Osolobue ri makeni okennyeh ohu hu wu Jizosi hume isi.

²⁰ Iwu Mozizi rubanhan d'e me ni ihian danwaye iwu, gi e marinwaye ke we mehan ndi-njo. Kani ebe ime-njo no ba uba, ebefu ke efoma Osolobue no bakaride uba—²¹keni o hun uzọ me ni erira njo don gi onwun ki ke efoma Osolobue k'a don nwan gi ikuni ihian ohunma le ikpo we

ndi ri k'ọ cho kị—gi erira me ihian nwehen ndun-itẹbite ghahani Di-nwonn-enyi wu Jizos' Kraisti.

Isi Nke Isin

Nwunnahin Njo, N'i Rini Osolobue Ndun

¹ Kị enyi k'e ku nwan? Nị enyi mesonme nwan njo keni efoma *Osolobue* hun uzọ a bawaye uba? ² Mba nu! Nani ke enyi, hun nwunnahinguu njo e don to ime njo e bi? ³ Ra unu amarin ni ndi ile we buguu che ime Jesu Kristi ghahani ime we mirin-Chuku, ni e buguo we we che ime onwun Jesu Kristi nwun?

⁴ Ya wu, e giguọ we mirin-Chuku we me enyi ligbama enyi le Jesu, gi e me enyi wuru ndi son e nwun, keni enyi nwen hun uzọ lihi, bimezikwo ndun ohun, rike ke we don gha onwun weli Jesu ghahani iken ahun Nedi enyi wu Osolobue gi nwe ogho.

⁵ Ebe o me ni enyi le ya a wuguo ohu enina ghahani onwun a, enyi le iya k'a wuzikwo ohu ghahani igba onwun lihi k'ọ don gha onwun lihi, ⁶ make ni enyi a maringho ni ya le onye hun enyi te wu ke we kpogbu enu-obe hu, keni we hun uzọ nafu eje-ihian ahun enyi te wu iken, amamgbe njo gha a kizi enyi ke igbon. ⁷ (Make ni onye hun nwunhunni a wanahinguo njo, njo e nwonzi iken ebe o ri.)

⁸ O me nwan ni enyi e songuo Kraisti nwunhun, enyi kweri ni enyi k'e sonzikwo a rizi ndun— ⁹ make ni enyi a maringho ni hunni Kraisti ghaguu onwun lihi, o nwunkozi; onwun enwezi iken ebe o ri. ¹⁰ Make ni, onwun o nwun, njo k'ọ nwunnahin; mgbe ohuni suo k'ọ nwun, o nwunkozi. Ndun o ri e bi kikenni, Osolobue k'ọ ri e bi n'e. ¹¹ Erirazikwo, unu le enwen onu k'e weririri enwen onu noke ndi nwunnahinguu njo le ndi no ime Kraisti wu Jizosi a ri ni Osolobue ndun.

¹² Ya wu, anikwole ni nwan njo a ki ehụ unu, e me unu a gbaye eje-ihien ndi hun a gunsonme ehụ unu; ¹³ ewekwole ni mkpamkpa-ehụ onu yeme njo n'o gi henrin ihien-orun o gi e me eje-ihien. Ka wechanrin ni enwen onu ye Osolobue noke ndi hun we ghaguu onwun weli hun ri ndun; onu e wechanrin mkpamkpa-ehụ onu ile ye Osolobue noke ihien-orun o gi e me ihien o cho. ¹⁴ Njo akiko unu—makeni unu arizi e bi okpuru iwu kani okpuru efoma Osolobue ke unu ri e bi.

Ndi-kwerini Wu Igbon Iri-ochan

¹⁵ Ki enyi e mezi nwan? Ni enyi mesonme nwan njo makeni okpuru efoma Osolobue ke enyi ri elezi okpuru Iwu? Kaka akp'ohu! ¹⁶ Unu amarin ni onye unu hatu enwen unu yeni ni ya ke unu a gbaye, iya ke unu wu igbon e? Omeni njo ro, ohun k'e buhe onwun; omeni ihume-isi ro, ohun k'e me unu wuru ndi ri ochan. ¹⁷ Kani, ekele ya rini Osolobue, ni, o suokwo n'a ni unu te wu igbon njo, unu e giguu nwan obi unu ile gbaye ihien ri nkuzi hu unu nwonhen; ¹⁸ a gbafuhaguu we unu eka njo, unu no henrin igbon iri-ochan. ¹⁹ (M ri e ku e hu ke ihian e ku ken'o ni unu ghoha.) Eka ohu hu unu gi we mkpamkpa-ehụ unu ye ihien-uru le eje-obibi noke igbon—hun unu te gi ri e bi eje-obibi, e biwaye, gizi ni nwan eka ohu hu we mkpamkpa-ehụ unu ye ezi-omume, keni unu ri nsọ.

²⁰ Ogen hu unu gi wu igbon njo, onwonna ugwo owule unu gi ezi-omume hun unu e gi gbaye e. ²¹ Elee erere ke unu nwonhen ime ihien ndi hu unu e me ogen ahun—hun ri nwan e me unu ifenren? Onwun, ya ke ihien ndi hu buhe! ²² Kani, hunni o me nwan ni Osolobue a gbafuhaguu unu ime njo, unu e henrin igbon Osolobue, erere unu e nwehen wu ni unu ri a ri nsọ. Ihien onwan k'e buhe wu ndun itebite. ²³ Makeni, ugwo-orun njo wu onwun, kani,

ihien Osolobue e ye ofe wu ndun itebite hun ri ime Jesu Kristi Di-nwonni-enyi.

Isi Nke Eṣa

Ihien We Gi Olulu Di-le-nwunye Kowa

¹ Umune m, unu amarin ni ebe ihian ri ndun suo ke Iwu no a ki a? (A maringho m ni m ri e de ni ndi marin Iwu.)

² Ya k'o gi meni okpoho nwon di k'a luriri di e hu, kasi a me ni di e ahun hu ndun. Kani, di e nwunhun, iwu di-le-nwunye egizi e. ³ Ya wu, omeni ya le okennye ozo a suoma mobu luma bu di e hukwo ndun, we k'a kpo a onye zo-uku-ye-ofia; kani omeni di e a nwunhuguo, iwu hu egizi e. O luma okennye ozo, o zoni uku ye ofia.

⁴ Umune m, erira k'o rizi ni unu. Make ni unu wu mkpamka-ehi hu Kraisti gi nwunhun, unu le iya gba nwunhun; ya wu, unu a nwunnahinguo Iwu Mozizi, keni we hun uzo we unu ye onye ozo luru, onye hu Osolobue gha onwun weli, keni enyi banni Osolobue erere, min'a mkpuru. ⁵ Make ni, ogen hu enwen enyi gi ri a ki enyi, eje-ihien ndi ahun Iwu kpotiensonme ri orun ime mkpamka-ehi enyi, a runpuha ihien onwun gi e gbu. ⁶ Kani, enyi e nwinguo nwan enwen enyi, enyi arizi okpuru Iwu Mozizi, make ni enyi a nwunguo—nwunnahin ihien hun te gi enyi mbu, keni enyi hun uzo gi uzo ohun ahun Mmonso a ki feme Osolobue, elezi uzo akan, uzo ahun Iwu hu we de e de a ki.

Iwu Le Njo

⁷ Kini ke enyi k'e kuzi nwan? Ni enyi si nwan ni Iwu Mozizi wu njo? Mba nu! Make ni, emeni ele Iwu, m'e ke marin ihien njo wu. Omeni Iwu asini, "Anile ihien owule na i enya," m'e ke marin ihien o wu ni ihien a la ihian enya. ⁸ Kani njo no hun ihien ahun Iwu ku tudon, gi e

kpọtienchanrịn ihien ọlila-ẹnya rị ichen-ichen ime m. Ya wuni, omeni ẹle Iwu, njo wu ihien nwunni.

⁹ M te hu ndun ke iwu keleni biani m; kani, ogen ihien hu Iwu ku gi bja, njo no tulua— ¹⁰ m no nwunhun. Iwu hun nke e ye ndun no weheni m onwun! ¹¹ Njo no hun ihien ahun Iwu ku tudon, gi e dufie m, gi e gbu m. ¹² Ya wu, Iwu le enwen e rị nso; ihien hu Iwu ku rizikwo nso, rị mma ẹnya Osolobue, rị mma nke-esi.

¹³ Ya wu ni ihien hun rị mma buheni m onwun? Kaka akp'ohu! Njo ya me e. O no puhachanrịn ifon ni njo wu njo—makeni o gi ihien rị mma buheni m onwun. Ya wu, e gigo we ihien hu Iwu ku ghosi ke njo no—ni njo a joka njo.

Ndun Ari Ihian

¹⁴ Enyi a maringho ni Iwu wu ihien ime-mmom, kani mme nwen wu ihian-mmaka hun nwonleni Mmom-nso—hun njo rị a kichanrịn ke igbon o non enon. ¹⁵ M'a ra ghota ihien m rị e me. Makeni, m'a ra me ihien m cho ni m me, kama, ihien hun e ze m ize, ya ke m'e me. ¹⁶ Ebe o me nwan ni ihien hun m choleni ni m me ke m'e me, ya e me m e kweri ni Iwu hu rị mma nke-esi. ¹⁷ Ya wu nwan ni elezi mme rị e me e, kani, njo hun rị ime m rị e me e. ¹⁸ Makeni, a maringho m n'o nwonni kaka akpu ihien ohu rị mma hun rị ime m, ya wu ime mme wu ihian-mmaka. Makeni, m'a cho ni m me ihien rị mma, kani, m'a ra saeka me e. ¹⁹ M'a ra me mma hun m cho ni m me, kani eje-ihien hu hun m choleni ni m me ke m'e mesonme. ²⁰ O me nwan ni m'e mesonme ihien m choleni, ya wu ni elezi mme rị e me e—njo hun rị ime m rị e me e.

²¹ Ya wu, a hunguwo m'a nwan n'o nwe iwu rị orun ime m, a ki m, hun o gi e me ni m cho ni m me mma, eje-ihien suo ke m'a sa eka e me.

²² Ezie, Iwu Osolobue a sūo m asūo, a sūoru m akpakali obi. ²³ Kani, a hūn m iwu ichen ri orun ime ehū m, a lūson Iwu ahun ri m mma oḡun; iwu ichen ahun ri a kini m e me m a gbaye njo hūn ri mkpamkpa ehū m a rūn.

²⁴ Euu, uya e gbue m! Onye k'a gbaṣuha m eka ehū ni ri e buheni m onwun?!

²⁵ Ekele ya riṅi Osolobue n'o jenk'e me e ghahani Di-nwonna-enyi wu Jesu Kristi!

Ya wu, o me uche m, m wu igbon Iwu Osolobue; kani, make njo hūn ri ime m, m wu igbon njo.

Isi Nke Eṣato

Ndun Mmon-nso Ri A Ki

¹ Ya wu, o nwonna ikpe-omuma owule ri ni ndi hūn ri ime Kraisti wu Jizosi. ² Makeṅi, iken iwu ahun Mmon-nso gi a ki, e ye ndun, hūn ri ime Jesu Kristi, a gbaṣuhaguo enyi eka iken iwu ahun njo gi a ki e buhe onwun. ³ Makeṅi Osolobue e meḡuo nwan ihien hu Iwu Mozizi saleni eka me, hūn Iwu saleni eka me makeṅi iken ari ime ihian. Osolobue e meḡuo a ghahani igi ifiri njo zihē Nwa a n'ọ wuru ihian nọke enyi ndi-njo, o nọzi nwan ma njo ri ime ihian ikpe ghahani ima ya wu Nwa a ikpe. ⁴ Osolobue me onwan ken ihiēn ndi ahun ri Osolobue mma enya hūn Iwu cho hūn uzọ mezu ime enyi ndi hūn rizilēni e bi ke ihian-mmaka, kani ke Mmon-nso don cho.

⁵ Ndi hūn ri e bi ke ihian-mmaka e ro iroro ke ihian-mmaka, e me ke ihian-mmaka; kani ndi hūn e bi ke Mmon-nso don cho e ro iroro ke Mmon-nso, e me ihien Mmon-nso cho. ⁶ Iro-iroro le ime ihien ke ihian-mmaka e buhe onwun, kani, iro-iroro le ime ihien ke Mmon-nso don cho e ye ndun le udon. ⁷ Makeṅi, onye hūn e ro ke ihian-mmaka ara kweyeni Osolobue kaka, ara gbaye Iwu

Osolobue; ezie, o sako eka gbaye e. ⁸ Ndị hun e bi ke ihian-mmaka a saeka me efo suo Osolobue usuo.

⁹ Kani, nke unu nwen, unu a ri e bi ke ihian-mmaka. Mmon-nso ya ri a ki unu—omeni ezie ro ni Mmon Osolobue ri ime unu. Bu, onye owule nwonleni Mmon Kraisti ele nke Kraisti. ¹⁰ Kani, omeni Kraisti ri ime unu, ezie ro ni ehun unu a nwunguo make njo, kani mmon unu ri ndun makeni unu e henringuo ndi ri ke Osolobue cho.

¹¹ Omeni Mmon onye hun gha onwun weli Kraisti bi ime unu, onye hun gha onwun weli Kraisti, me n'ọ rizi ndun, siko d'e mezikwo ni ehun unu hun a nwunni ri ndun—ghahani Mmon a hun bi ime ndun unu.

¹² Umune m, ya wu nwan ni o nweni ugwo enyi gi ihian-mmaka ahun enyi te wu hun enyi e gi bi k'ọ cho.

¹³ Makeni, unu bime ke ihian-mmaka, unu k'a nwunriri. Kani, unu ghaha Mmon-nso gbupu eje-ihien ndi hun ehun e me, unu k'a ri ndun. ¹⁴ Makeni ke we han Mmon Osolobue ri e du, uwe wu umu Osolobue. ¹⁵ Makeni mmon hun Osolobue ye unu ele nke igbon, hun unu e gi tumazi egun, kani Osolobue ye unu mmon hun o gi munrun unu, Mmon ahun e me enyi a hi Osolobue, “Baba! Baba Nedi m!”

¹⁶ Mmon-nso le enwen e a shia eri, a gwa mmon enyi ni enyi wu umu Osolobue nke-esi. ¹⁷ O me nwan ni enyi wu umu, ya wu ni enyi wu ndi ihien nedi we k'e ru eka, ndi ihien nedi enyi wu Osolobue k'e ru eka—ndi we le Kraisti gba nwe ihien Osolobue, omeni enyi e son Kraisti ta afunfun a, keni ogho a hun uzo ruzikwo enyi eka.

¹⁸ E gigho m'a don ni afunfun enyi ri a ta ogenni enwon ihien o wu ebe ogho ahun jenko d'a biani enyi ri.

¹⁹ Oghoni hain ihien ile Osolobue ke gi nwan e che, e chekenme, ni Osolobue ghosi ndi wu umu a. ²⁰ Makeni Osolobue bu ihien ile o ke eke toni uya; eleni ihien we

Ogho Hun Lalani Ni Enyi

¹⁸ E gigho m'a don ni afunfun enyi ri a ta ogenni enwon ihien o wu ebe ogho ahun jenko d'a biani enyi ri.

¹⁹ Oghoni hain ihien ile Osolobue ke gi nwan e che, e chekenme, ni Osolobue ghosi ndi wu umu a. ²⁰ Makeni Osolobue bu ihien ile o ke eke toni uya; eleni ihien we

ke eke cho n'ọ rị ime uya, kanị, makeni Osolobue hun bu e toni uya cho n'ọ rị erira, makeni o nwegho ihien o bu obi. ²¹ o bu obi ni omegu, o wepuhazikwo ihien ndi ozo ile o ke ime egbun we ri, amamgbe we ghazi e rehi, e son we umu Osolobue weri enwen we, son we nwerin ogho. ²² Makeni enyi a maringho ni ihien ile Osolobue ke hu a sun uden noke okpoho ime ri e me—d'e rukwo ogenni. ²³ Elede ihien-okike suo ri a sun uden; enyi nwen hun nwonhengude Mmon-nso hun wu ihien ibuzo Osolobue gi a ghosi ni ogho ahun ile lalachanrin, enyi huzikwo nwan a sun uden, ke enyi don ri e che ni Osolobue murunchanrin enyi, n'o wepuha ehụ enyi ime uya, gi e henrin hun ghaleni e rehi.

²⁴ Ihienni enyi ri e lee enya a ke Osolobue gi ifiri e zuofuha enyi. Enyi e ke nwehen e, nke enyi a tubehi enya a —makeni ilee-enya ihien, bu y'a hunguo a, elezi olil'enya. Onye ime enyi a hunguu ihien e lemezi enya a? ²⁵ Kanị, emeni enyi e ke hun ihien enyi ri e lee enya a, enyi e gi ndidi e che e.

Eyemeka Mmon-nso

²⁶ Mmon-nso huzikwo e yeni enyi eka ebe o meni enyi e zuni oke.

Enyi amarin ihien enyi k'a rịo ime ekpere, kanị Mmon-nso le enwen e gi isun-uden a riodonni enyi ebe Osolobue ri; o gi isun-uden ahun e ku ihien onu ghaleni a saeka e ku. ²⁷ Osolobue hun e legha obi enyi marin ihien Mmon-nso ri a rịo, makeni Mmon-nso a riodon ni ndi-nso ke Osolobue don cho.

²⁸ Enyi a maringho ni Osolobue e gi ihien ile le onodi ile a run, a runpuhani ndi ahun ihien e a suo ihien ri mma, ndi ahun o kpọ make ihien cho n'o me. ²⁹ Osolobue a maringule we mbu-mbu n'o d'a kpọ we. O maringuu we, o no hoto we n'o jenkọ d'e me we ni we ri ke Nwa a, keni

Nwa a wuru nwa-ibuzo ime umu bu oda. ³⁰ Ndinị o hoto k'ọ kpọ; ọ kpoguu we, ọ no kuni we ohunma, ya ọ no nwan we ogho ye we.

Ihiẹn-osisuo Osolobue Nwe Hun Ri Ime Jesu Kristi

³¹ Ebe o me ni ihien ndini no enina, ke enyi k'e ku nwan? O me nwan ni Osolobue ri azuun nke enyi, onye k'a saeka nu enyi ogun? ³² Omeni Osolobue anoni Nwa a ye azuun, kama, o gi ifiri enyi ile we e ye, o yechanrinko enyi ihien ndi ozo ile—cheni Nwa a? ³³ Onye k'a sa nwan eka ma ndi hun Osolobue hori ikpe—ebe o me ni Osolobue le enwen e ri e kuni we ohunma? ³⁴ Onye k'a ma we nwan ikpe—ebe o me ni Jesu Kristi ri nwan eka-nni Osolobue a ri donni enyi!? Jesu Kristi hun nwunhunni; elede onwun suo k'o nwun, kama, Osolobue ghazide onwun weli e. ³⁵ Onye k'a sa nwan eka wepu enyi ime ihien-osisuo Kraisti nwe ebe enyi ri? Ni nsongbu saeka me e? Ra afunfun? Ra ukpokpo; ra unwun le egun; ra ahunni ekwa je; ra eje-onodi; ra opia-agma we gi e gbu ihian hun ³⁶ Ekukwo-nsọ gi si,

“Ifiri i

ke onwun gi a kpọ enyi ihun ogen ile;

we e me enyi ke atunrun

we dukọ d'e gbu.”

³⁷ Mba nu, o nwonni hun k'a sa-eka!! Ime ihien ndini ile, enyi wu ndi-mmeri ka ndi-mmeri ile, ghahani onye ahun nwe ihien-osisuo enyi! ³⁸ Makeni, o weguo m enya ni ke onwun ke ndun, ke ndi mmon-ozu ke eje-mmon ndi ri a kini, ke ihien ri ogenni ke ihien ri ihun, ke iken ile rin; ³⁹ ke ihien jen elu ke ihien mi mgbugbu, ke ihien ozo owule we ke eke—o nwonni hun k'a saeka wefu enyi ime ihien-osisuo Osolobue nwe ebe enyi ri, ihien-osisuo a hun ri ime Kraisti wu Jizosi Di-nwonni-enyi!

Isi Nke Itenei

Osolobue Le Ndi-Izrelu

¹ M ri e ku ezioku id'anya Kraisti, ari m a tu ntu—ihori m ri a ghoni m idanya Mmon-nso ni ari m a tu ntu, ni ² oken ekwan jun m obi, ni ogen ile ke obi gizikwo a cho n'o gbawapu m ³ ebe m n'e ro ndi ali m! Nke o ri m ni Osolobue bu m onu—wepude m ime Kraisti—omeni ohun ke we e gi nwon nzuopuha.

⁴ M ri e ku oku ndi Izrelu: uwe ke Osolobue gi henrin umu; uwe k'o ghosi ogho a; uwe k'o ye nkwerigbama ahun o kwademe; uwe k'o ye Iwu hu; uwe k'o tumeni ofufe hu ri ime Iwu; uwe nwehen nkwa ndi hu Osolobue kwe; ⁵ Ebrahim le ndi-nedi mbu hu we marin amarin wu ndi nke we; ebon we ke we muye Kraisti rike ihian—Kraisti, hun wu Osolobue hun ihian ile le ihien ile ri okpuru e, hun richanrin mma jenrin ejen! Isee.

⁶ Eleni ihien oku Osolobue ku banyeni ndi Izrelu a ghazini. Mba. Makeni, ele ndi Izrelu ile wu ndi Izrelu nke-esi. ⁷ Elezikwo ndi ile gha ehụ Ebrahim puha wu umu a nke-esi, makeni, Osolobue si Ebrahim, “Eka Aziki ke umu we jenkọ d'a kpọ umu i k'a gha bia.” ⁸ Onwan ghosi ni ele umu we mu ke ihian don a mu nwa wu umu Osolobue, kani, umu we mu ghahani nkwa hu Osolobue kwe, uwe ke we a gunye ni we wu umu nke-esi. ⁹ Makeni, ogen Osolobue gi kwe ya wu nkwa, ihien o ku wu: “Mgbeni akan-ile, m k'e kinhen, Sara a mu okennyẹ.”

¹⁰ Eledẹ ohun suo. Makeni, ogen Ribeka gi ri ime ejime, nedi ohu ke we nwon, hun wu Aziki nedi enyi; ¹¹ kani, ni we d'a mu we, ke we keleni me ihien owule—ke mma ke njo—Osolobue no gwa Ribeka oku, igi ghosi ni omeni Osolobue cho n'o me ihien, o gi eka a a hori ihian, a kpọ a— ¹² ni ele ihien we run k'o gi a hori we. Ihien Osolobue

gwa Ribeka wu, “Hun kani siko d'e fe hun-nta.” ¹³ O rihu ke we don de e ime Ehuhuo-nsọ, si,
 “M nwe ihien-osusuo jenni Jekopu;
 kani, enwen m ihien-osusuo jenni Iso.”

¹⁴ Ni enyi si nwan n'o nwon onye Osolobue e gbeyeni? Mba, kaka! ¹⁵ Makeni o si Mozizi, “Onye owule m cho ni m me omiken e ke m k'e me omiken e; onye owule m cho ni m me ebere e ke m k'e me ebere e.” ¹⁶ Ya wu ele ihien ihian cho mobu ihien ihian run ke we gi e me e, kani omiken Osolobue suo. ¹⁷ Ime Ehuhuo-nsọ, Osolobue si eze alị Ijptu wu Fero, “M tume i eze keni m gi i ghosi iken m, keni m gizikwo a me efan m ghagbari uwa ile.” ¹⁸ Ya wu nwan ni onye owule Osolobue cho n'o me omiken e ke o me omiken e, kani ndi o cho ni we gba isi-akwanran, o mezikwo we gba isi-akwanran.

Iwe-le-onuma Osolobue Le Omiken E

¹⁹ Kani unu k'a si m, “Omeni enina k'o me, ki haenzi Chuku gi a koriani enyi wu ihian? Onye gbondontu uche Chuku?” ²⁰ Kani, iyu wu ihian-mmaka, onye k'i wude nwan i gi a shiagwari Osolobue? Ni ihien we kpu akpu juma onye kpun'a, “Ki haiz i gi kpu m enina?” ²¹ Ele okpu-ite nwe ku ihien o k'e gi okpukpu-urua kpu? O nwe iken igi e kpu ite we gi e me ihien-oghọ, o nwezikwo iken gi ya wu okpukpu-urua kpu ite we gi e gbu ani.

²² Kini ri a omeni Osolobue gi oken ndidi son ndi hun o kwademeguun toni ntikpo, keni o ghosi iwe-le-onuma a, mezikwo ihian marin iken e? ²³ Kini ri a, omeni o me e keni o we oken ogho a ghosi ndi o cho n'o me ni omiken, ndi o kwademeto n'o k'e ye ogho, ²⁴ ya wu enyi, ndi ahun o kpo—hun o me ni ele ime ndi Ju suo k'o gha kpori enyi kani ke ime ndi Ju ke ime ndi wuleni ndi Ju. ²⁵ Onwan k'o ku ime Ekukwọ-nsọ, ime ehuhuo Hozia, si,
 “Ndi wuleni ndi nke m

ke m k'a kpọ 'Ndi nke m.'
Alị hụ te rịlẹni m obi ke m k'a kpọ
'alị hụ rị m obi.'

²⁶ Ebe ohu ahụ n wẹ nọ sị wẹ,
'Ụnụ ẹlẹ ndi nke m'
ke wẹ k'a nozi kpọ wẹ
'umu Osolobue ahun rị ndun.' ”

²⁷ Nke ndi Izrelu, Azaya gi wẹ yi oro, si,
“Osuon'a ni ndi Izrelu buhan oda
ke ejan rị mkpenren iyi,
ndi k'e nwon nzuofuha ime wẹ ebuko oda,

²⁸ makeni,
Di-nwonni-enyi siko d'e yekenrin ndi alị hụ afunfun hụ o
ku,
ye wẹ ya ru alị!” ²⁹ Eriira ke ya wu Azaya kuzikwo mbu, si,
“Omēni Osolobue Hun-nwon-iken-ile e te menī ni wẹ
gbuhodu ni enyi umu, nke enyi a riguo ke Sodom, nke enyi
a no ke Gomora.”

³⁰ Ke enyi k'e kuzi nwan? Ni ndi wulenī ndi Ju, hun te
rileni a cho ke w'a don rị ochan, a riguo nwan ochan—iri-
ochan wẹ gi okukwe nwehen; ³¹ bu ndi Izrelu, hun rị a lu ni
wẹ gi idonme Iwu rị ochan, asani eka rị ochan. ³² Ki hain
wẹ gileni sa eka? Makeni egini wẹ okukwe chu a, kama,
wẹ me e ke si ihien wẹ run ke w'e gi rị ochan—ya wẹ no
kpogburu “omuma-mkpogburu ahun,” kpogburu— ³³ rike
ke wẹ don de e ime Ekukwo-nsọ, si,

“Lee enya,
e butoguo m omuma ime Zayonu
hun k'e me ihian kpogburu;
nkume hun k'e me wẹ dan.
Kani,
o kpuyeko ndi kwerini n'e.”

Isi Nke Iri

Ekpere Pọlụ E Mēni Ndi Izrēlụ

¹ Umunę m, ihien hụn a gun m egun lę ihien m'a rịo Osolobue ime ekpere n'o menị ndi ali m wu ni we nwe nzuopuha. ² M k'a saeka shia ni we eri ni ihien Osolobue a du we adu, kani, amamihien aria. ³ Makeni, ifiri ni amarin we uzọ ahun Osolobue gi e me ihian a ri ochan bu we hu a nwan ni we me e uzọ nke we, eweni we enwen we che uzọ hu Osolobue gi e me ihian a wuru onye ri ochan. ⁴ Makeni Kraisti wu isi-njendeme Iwu, keni onye owule hun kwerini hun uzọ henrin onye ri ochan ghahani ikwerini Kraisti.

Onye Kweri, O Wanahin

⁵ Nke iri-ochan ghahani idonme Iwu, lee ihien Mozizi de banyen'e: "Onye owule hun e donme ihien ndini Iwu ku wu onye k'e gi we ri ndun*." ⁶ Kani, nke iri-ochan ghahani okukwe, ihien Ekwkwo-nsọ ku wu, "Ajukwole ni enwen unu ke 'Onye k'e jen nwan elu-igwee?' (Ya wu, keni o d'e wehe Kraisti) ⁷ mobu 'Onye k'e jen nwan ani-mmọn' (ya wu, keni o d'a gha ime onwun weli Kraisti.)" ⁸ K'ọ si ihian me? O si, "Oku Osolobue ri unu nsue—o ri unu ugb'onu, ri unu ime obi." Elee oku ro? Oku-okukweni enyi ri e kusonme: ⁹ ni, i gi onu i ku e ni Jesu wu Di-nwonni-i, y'e kweri ime obi i ni Osolobue gha onwun weli e, i k'e nwon nzuopuha. ¹⁰ Makeni, ihian gi obi e kweri, o wuru onye ri ochan; o gi onu a ku e n'o kwerigho, Osolobue a zuopuha a. ¹¹ Makeni, Ehuho-nsọ si, "O kpuyeko onye owule kwerini n'e." ¹² Makeni aka ohu ke Osolobue gi e son onye owule, ke ndi Ju ke ndi wuleni ndi Ju. Nna ohu ahun wu Nna ihian ile. O hu ngozi e e kpu onye owule kpokun'e, e hukpu we

* **Isi Nke Iri:5** Livitikosji 18.5

ya oḁa-oḁa. ¹³ Makeni Eḁuḁo-nsọ si, “Onye oḁuḁe kpọku efan Onye-nwọnni-onyi k'e nwọn nzuọpụha.”

¹⁴ Kani, nani ke w'a dọn kpọku onye we keleni kweri ni? Nani ke w'a dọn kweri ni onye we keleni nutu banyeni? Nani ke w'a dọn nu banyen'e omeni o nweni onye zi we ozi banyen'e? ¹⁵ Nani ke w'a dọn zi ya wu ozi omeni e zipuni we ndi-ozidi e zi ya wu ozi? Ya ke Eḁuḁo-nsọ gi si ni “Obibia ndi-ozidi hun e wehe ozioma a rika mma, ijen we a rika mma.” ¹⁶ Kani, ele ihian ile kweri ozioma. Azaya le enwen e si, “Di-nwọnni-onyi, onye kweri ozi onye zi?”

¹⁷ Ya wu, ihien ihian nu k'o gi e nwe okukwe; ihien w'a nu nwehen okukwe wu ozi banyeni Kraisti.

¹⁸ Kani, m ri a ju ke ndi Izrelu anuni ya wu ozi? Ezie, a nugo w'a. O rihu ke Eḁuḁo-nsọ dọn ku, si, “Olu we a puole, o ruole uwa ile; ihien we ri e ku e rugo njendeme uwa.”

¹⁹ M rizi nwan a ju ke ndi Izrelu aghotani? Nke ibuzo, Mozidi le enwen ku ni Osolobue si, “M k'e gi ndi nwoleni ihien we wu, me enya fuma unu ufu; m k'e gi ani ndi nzuzu kpasu unu iwe.”

²⁰ Azaya no rikin obi kude hunni Osolobue ku, ni, “Ndi rileni a cho m, uwe hun m; e we m enwen m ghosi ndi ghaleni a ju ukwere m.”

²¹ Nke ndi Izrelu, Azaya ku ni Osolobue si, “M shiafu eka m ke uhuhin han ken m nabanhan ndi nnuwu-isini, ndi isi-ikenni.”

Isi Nke Mmana;

Omiken Osolobue Gi E Son Ndi Izrelu

Ndị Rom Isi Nke Mmanai:1 27 Ndị Rom Isi Nke Mmanai:10

¹ Nị m ju nwan ajuju, “Osolobue a jugo ndi nke e wu ndi Izrelu?” Mba, kaka! Makeni, mme le enwen m wuzikwo onye Izrelu, nwa Ebrahim, onye ikpun-ulọ Benjamini. ² Osolobue ajuni ndi nke e, hun o hoto gha isi mbidon lala!

Unu anyanhanni ihien Ehuho-nsọ ku ebenu Elaija no ri e kpe ndi Izrelu aka Osolobue? Ke Elaija don si, ³ “Di-nwonna-enyi, e gbuchanringo we ndi-amuma i, tikpoposonme ebe ndi w'a no a chuyen'i ejan. Mme suo hodu, bu we ri nwan a cho ni we gbu m!” ⁴ Kani, kini ke Osolobue za a? Osolobue si a, “E butogo ni m enwen m madu nnu-uku esa (madu ogun-iri kwasị nnu-mmesa) hun gbutuleni ni mmon Baa osekp.”

⁵ Erira k'o rikwo nwan; o nwonghozi ndi buleni oda hoduni hun Osolobue gi efoma a hoto. ⁶ O me nwan ni efoma k'o gi me e, ya wu elezi ifiri orun ihian run—nke o me ni efoma elezi efoma.

⁷ Kini me nwan? Ndi Izrelu ahunni ihien we ri a lugbu enwen we, a cho; kani ndi ahun buleni oda Osolobue hori suo wu ndi hunn'a—Osolobue a kpo kin obi ndi hoduni,

⁸ rike ke Ekwwo-nsọ don ku, si,
“Osolobue no me we amarinzile
ihien we ri e me;

me enya we eleghale uzo;

me ntin we anule ihien—

d'e rukwo nwan tanni.”

⁹ Defidi si,

“Ihien-oriri we ya wuru onyan,

onyan we gi nwundon we,

ya wuru omuma hun e me we a kpo gburu;

ya wuru ihien we gi megwari we.

¹⁰ Enya ya kpu we ishi,

amamgbe w'e legha uzo;

we hieto jenin ejen!”

Ndi Rom Isi Nke Mmanai:1128Ndi Rom Isi Nke Mmanai:21

¹¹ A ju m nwan ajuju: ke ndi Ju kpogburu, we dangwongwon adangwongwon? Mba, kaka! Kama, make ni we me njo, nzuofuha a biagwoni ndi ali ndi ozo, keni enya fuma uwe wu ndi Ju. ¹² O me nwan ni njo ndi Ju, ndi Izrelu, weheni uwa eregede ihien ri mma—ni edan we dan weheni ndi wuleni ndi Ju eregede ihien ri mma, ihien ka oda apuhako ogen we gi wekinhen we, ogen nke we e gi richanrin mma?

Kę Nzuopuha ndi Wuleni Ndi Ju Ri

¹³ M ri nwan a gwa unu ndi wuleni ndi Ju. Ebe o me ni m wu onye-ozu pu-ichen Osolobue ebe ndi wuleni ndi Ju ri, m'e mekenme oku orun m, ¹⁴ ikenkwo ni m saeka gi uzoni me enya fukemwe ndi ali m, keni m s'eka zuopuhade ndi hu ime we. ¹⁵ Make ni, omeni iju we togbo ke uwa le Osolobue gi don, kini ke inabanhanni we k'e wehe nwan? O meko igha onwun rizi ndun?!

¹⁶ Omeni hun we bu uzo beri ye Osolobue hugho nsu, ya wu ni ogbe bredi we gha beri e rizi kwu nsu; omeni mkpogun osisi ri nsu, agala ndi rin'a huzi kwu nsu.

¹⁷ Omeni we kwapusonme agala olivu we kun akun, we unu wu agala olivu-ofia cheni ndi hoduni d'e son we ri erere ri olivu hu, ¹⁸ eleniakwole ni agala ndi hu mobu nyanma ni we isi. Kani, unu nyanma isi, nyanhankwo ni ni ele unu bu mkpogun osisi ahun, mkpogun ya bu unu.

¹⁹ Kani i k'a si, "Eghee, ifiri m ke we gi kwapu agala ndi ahun nu, keni o beyeni m uzo." ²⁰ Ezioku ro. Kani, we kwapu we make ni ekwerini we, bu unu nwen we buche ebuche ri ebuhu make ni unu kweri ekweri. Ka egikwole n'e pacheme, kama, gikwo ni egun e bi! ²¹ Make ni, omeni Osolobue ahatuni ndi Ju hun wu ezigbo agala osisi hu, o hatukokwo unu-o!

Ndị Rom Isi Nke Mmanai:2229Ndị Rom Isi Nke Mmanai:31

²² Ebeni ke enyi no hun efoma Osolobue le aka-iken e: o gi aka-iken e son ndi hun danpuni; kani, o gi efoma e son unu ndi kwerini—kasi a me ni unu nodihukwo ime efoma a. Kani, omeni unu anodisonmeni, o siko d'a kwapuzikwo unu nwen. ²³ Nke ndi Ju hu we kwapu makeni ekwerini we, we kweri, Osolobue k'e we we che osisi hu—makeni o k'e ri-eka me e. ²⁴ Omeni Osolobue gha osisi olivu-ofia kwari unu, me ihien we ghaleni e me, we unu che olivu we kun akun, ya wu n'o k'a kade Osolobue nfe iwekinzi agalaba ndi we kwapu che osisi hun we gha kwafu we.

Omiken Suo Ke Osolobue Gi A Zuofuha Ihian

²⁵ Umune m, m cho ni unu marin eziokuni mini, ghotu a ohunma—amamgbe unu gha e ro ni unu a rika mma, pacheme. Ndi hu ime ndi Izrelu a wuruguo nwan ndi isi-akwanran; kani Izrelu agbasonmeko isi-akwanran jennin ejen—o k'a toruhu ogen ndi wuleni ndi Ju hun k'a bia d'e kunrun Osolobue k'e gi zu onu. ²⁶ Erirazikwo, ndi Izrelu ile jenkwo nwan d'e nwon nzuopuha, noka ke Ehuhuo-nsodon ku, si,

“Onye-nzuopuha k'a gha obodo Zayonu bia;
o k'e wepu njo ime igunrun umu Jekopu.”

²⁷ “Onwan wu nkwerigbama hun k'a ri egbata mme le we,
ogen m k'e gi wefu njo we.”

²⁸ Ebe ozioma ri, ndi Ju wu ndi inenren Osolobue make unu. Kani, o me nke ohori, ndi ihien we a suo Osolobue ke we wu—make ndi nedi we kani hun o hori. ²⁹ Makeni Osolobue ara gbहतो obi e banyeni oyiye o ye le oku o kpo.

³⁰ K'o don me ni unu ndi hun te wu ndi nnupu-isi okpuru Osolobue e nwonhenguwo nwan omiken aka Osolobue makeni ndi Ju nupu isi, ³¹ erira k'o donzi me ni we nwen a wuruguo nwan ndi nnupu-isi, keni omiken Osolobue me ni unu wuru uzwo we e gi nwonhenzikwo

Ndị Rom Isi Nke Mmanai:3230Ndị Rom Isi Nke Mmēbuo:4

omikēn ẹka Osolobue. ³² Makeni, Osolobue a gunguọ ihian ile ye ndi nnupu-isi, keni o hun uzọ me ni ihian ile omikēn.

Ija-mma Ya Rini Osolobue!

³³ Euu! Osolobue e mekenmeke odafin!

Amamihiēn ẹ le akọ-le-uche ẹ
e mike!

W'a ra saeka ghota iroro o tu!

W'a ra saeka ghota ke o me! ³⁴ Makeni Ehuhuo-nsọ si,
“Onye marin uche Di-nwonnienyi?”

Onye a dun a odun?

³⁵ Onye yetu ẹ ihien owule,
hun o gi kikin ẹ ya?”

³⁶ Eghẹ! Makeni, ihien ile gha ẹka a bia; ihien ile a ri
ghahan'a; ihien ile a rizikwo n'a.

Ojija-mma ya rin'a jenin ejen! Isee.

Isi Nke Mmēbuo

Obibi Furu Ndị E Fee Osolobue

¹ Umune m, m gi nwan ifiri omikēn Osolobue meni enyi a rijo unu, we ni ehụ unu ye Osolobue nọke ejan ri ndun we chuyen'e, ejan ri nsọ, ejan hun a sọ n'a—onwan wu ezigbo ofufe hun furu unu k'e fe. ² Akirinle ni obibi uwanj, kama, ni ni Osolobue gbanwon unu ghahani igbehutochanrin iroro unu. Me n'e keni unu hun uzọ marin ihien wu uche Osolobue, hun ri Osolobue mma, hun a sọ a usọ, hun zu oke.

³ Ghahani oyiye Osolobue gi efoma ye m, m si onye owule ime unu: ewerile enwen i kari ke i han, ka donrin enya lele enwen i, n'i marin ke Osolobue yehan i okukwe, ohun k'a gwa i ke i han, gwa i ihien i k'a kpọ enwen i.

⁴ Ke onye-onye ime enyi don nwe ehụ ohu hun nwe mkpamkpa-ehụ bu oda bu mkpamkpa ndi hu ile a ra run

ihien ohu, ⁵erira k'ọ ri ime Kraisti. Enyi ndi ri ime Kraisti bu oda, kani, enyi ile wu ehụ ohu. Onye-onye ri ime ehụ Kraisti hu wu nke ndi ozo ile. ⁶Enyi nwesonme oyiye ri ichen-ichen ke Osolobue don yesonme enyi. Omeni oyiye ihian wu izi ozi Osolobue si a zi le ibu-amuma, y'a me e ke okukwe e han. ⁷Omeni oyiye ijen-oziri ro, ya jenne ozi; omeni nkuzi ro, ya kuzime nkuzi; ⁸omeni igi oku-Chuku a kpoti eni obi ihian ro, ya mememe; omeni iyeni ndi nwonleni aka ro, y'a ha aka ohunma-ohunma; omeni okiki ro, ya runshi iken; omeni ime omiken ro, ya gi ighoghohu e me e.

Ihien-osusuo

⁹E nweni ihien-osusuo gha akpakali obi puha. Izize eje-ihien ya e ze onu; e kwonkenme ni ihien ri mma. ¹⁰Ihien ibe onu ya suoma unu oda-oda noke umune; e ye ni ibe unu ogho kari enwen unu. ¹¹Anikwole ni adudu unu benua, ka e zekenme ni ime-mmom, a runni Di-nwonni-enyi orun. ¹²A ghoghohu ni make lil'anya unu nwon; e nwon ni ndidi ime nsongbu unu; wuru ni ndi we gi e don enya ebe ime-ekpere ri. ¹³E son ni ibe unu e yeni ndi nke Osolobue ihien ri a ko aka. A nabanhan ni ndi-obia.

¹⁴A gozi ni ndi ri e kpokpo ni unu; a gozi ni, abukwole ni onu. ¹⁵Son ni ndi ri a ghoghoni ghoghohu, unu e son ndi ri a kwanni kwan. ¹⁶E gi ni obi ohu e bi. Apachekwole ni, ajukwole ni ison ndi onodi we lua ali a kpa mabu irun orun ndi lua ani w'a kporia. Erole ni ni unu ka ndi ozo mkpa a ri.

¹⁷Emegwarikwole ni onye owule eje-ihien. Donrin ni enya a hun a ni unu e me ihien k'a ri ihian ile mma enya. ¹⁸Lilimakenme ni y'e me ihien ile furu n'i me hun udon e gi ri egbata 'yu le onye owule. ¹⁹Ndi owu m, e megwarile ni; ka la ni mmegwari to ni Osolobue, makeni Ekukwo-nsos, "Di-nwonni-enyi si, 'Mme k'e megwari; mme k'a kukin.'

Ndi Rom Isi Nke Mmèbụọ:20 32 Ndi Rom Isi Nke Mmètọ:7

” ²⁰ Kama, “Omèni ẹgụn rị a ụn enènren i, y'e ye ẹ ihien-oriri; omèni ẹgụn ihien-orira rị a ụn a, y'e ye ẹ ihien o k'a ra. Makèni ị gha e mẹ ẹ, ị rị a bụọ ikeke-ọkụn a bụọye ẹ isi*.” ²¹ Anilẹ eje-ihien meri i, ka gi ihien-oma meri eje-ihien.

Isi Nke Mmètọ

Ihumẹ Ni Ndi-ọkiki Isi

¹ Ihian ile wẹ humẹ ni ndi-ọkiki isi. Makèni, o nwonni ọkiki rinị hụn Osolobue tumeleni. Osolobue ya tumẹ ọkiki ile rinị. ² Ya wu, onye owule nupu ni ndi-ọkiki isi ri e nupu isi okpuru ihien Osolobue tumẹ. Ndi e mẹ erira ri e weheni enwen wẹ afunfun. ³ Makèni, egun ndi ri a kinị ara tu ndi e mẹ ihien ri mma—ndi e mẹ eje-ihien ke egun w'a tu. Y'a choghọ nwan ni egun onye ri a kinị tubehi i? Meme nwan ihien ri mma. O k'a ja ị mma. ⁴ Makèni odibo Osolobue k'ọ wu—o n'a run orun make orinimma ị. Kanị, i mẹ eje-ihien, egun ẹ ya tumakwo ị, makèni opia hu o bu o gi e ye afunfun, o bukwon'a mmaka! Odibo Osolobue k'ọ wu, iya ke Osolobue gi e ye ndi e mẹ eje-ihien afunfun. ⁵ Ya wu, ihumẹ ni ndi ọkiki isi ri mkpa. Ele make wẹ gha e ye i afunfun sọ, kama, make obi i ghazikwo a ma ị ikpe.

⁶ Ya hainzikwo unu gi a ku ugwo-isi: makèni ndi ri a kinị wu ndi-idibo Osolobue hūn e gichanrin oge wẹ ile a ki. ⁷ Ku ni nwan onye owule ihien unu gi ẹ: omèni ugwo-isi ke i gi, y'a ku ugwo-isi; omèni eghe-ali mobu eghe ndi ozo w'a na ro, y'a ku a; omèni mgbaye ke i gi wẹ, y'e ye wẹ mgbaye; omèni ogho ro, y'e ye wẹ ogho.

Ugwọ Enyi Gi Ihian Ile

* **Isi Nke Mmèbụọ:20** mobu: ...ifenren e megbu ẹ.

⁸ Egheę, kụpu nị onye ọwụle ụgwọ ụnu gi we—mmani ihien-osisuọ, w'a ra gibehi ụgwọ ihien-osisuọ. Makeni, onye owule nwe ihien-osisuọ ibe e e mezuguo Iwu. ⁹ Ihien ndi hu Iwu ku: “Agherele; egbule ochu, ezule ohin; anile ihien ọwule la i enya” le ihien ozo ọwule Iwu ku ke we wegbama ime iwuni hun si, “Ihien ibe i ya suọ i ke ihien enwen i don a suọ i.” ¹⁰ Onye nwe ihien-osisuọ ihian asaeka me e eje-ihien; ya wu nwan nị onye nwe ihien-osisuọ ibe e e mezuguo Iwu.

Obibi Ndị Rị Imę Ukpe

¹¹ E bi ni nwan enina makeni unu a maringuo ogen enyi rị ime e: nị ogen e ruguo unu e gi gha uran tenhin, makeni ogen nzuofuha enyi a riguo nsue kari k'ọ rị oruru-ali hu enyi gi kweri. ¹² O teguo ohihị gba; eki e d'e fon. Nị enyi mēbehi ni nwan ihien ndi ahun wu ihien ishi, enyi e yiri ewuru-agma ndi wu nke ukpe gi a lu ogun. ¹³ Nị enyi e bi ni ohunma ke ndi rị e bi ogen eki gi rị enu. Enyi esonko nị we e jen eje-mmemme mobu a ra manya a tu; enyi aghereko nị mobu bime eje-obibi; enyi emeko nị ndi ikpe mobu ndi enya-ufu. ¹⁴ Kama, yiri ni Di-nwonni-enyi wu Jesu Kristi noke ewuru; erozile ni ke unu a don me eje-ihien ndi hun a gun ehụ unu egun.

Isi Nke Mmęno

Amale Ni Ibe Unu Ikpe

¹ A nabanhan nị onye kweri ni Jesu hun okukwe e keleni ze, kani, elękwọ hun unu e gi e son e hu a do ihien onye kweri le ihien o kwerileni:

² O nwe ndi kweri nị ihian furu n'o ri ihien ile, kani onye hun okukwe e zeleni e ri mkp'ehuhuo suọ. ³ Onye hun e ri ihien ile y'e leliale onye ghaleni e ri ihien ile; onye hun a so nsọ ya amale onye hun e ri ihien ile ikpe, makeni

Ndi Rom Isi Nke Mmęnọ:4 34 Ndi Rom Isi Nke Mmęnọ:13

Osolobue a nabanhanguo a. ⁴ Onye k'i wu i gi a ma odibo onye ozọ ikpe? Nna a k'e ku k'o turugho k'o turuni. Kani o k'e turu, make ni Di-nwonnienyi k'a saaka me n'o turu.

⁵ Onye ohu weri e ni uhuhuhin ohu ka nsọ a ri kari uhuhuhin ndi ozọ; kani onye ozọ weri e ni uhuhuhin ile wu ohu. Onye-onye ya kwonkenme hun we e enya. ⁶ Onye hun weri e ni uhuhuhin ohu ka mkpa gi ifiri Di-nwonnienyi e me erira. Onye hun e ri ihien ile gi ifiri Di-nwonnienyi e ri, make ni o ye Osolobue ekele make ihien-oriri hu. Onye hun a soni gi ifiri Di-nwonnienyi a so—e ye Osolobue ekele. ⁷ O nwonna onye owule ri ime enyi hun ri ni enwen suo ndun; o nwonzikwoni onye owule hun a nwunni enwen e suo. ⁸ Omeni enyi ri ndun, enyi ri ni Onye-nwonnienyi ndun; omeni enyi a nwunhun, enyi nwunni Onye-nwonnienyi. Ya wu, osuon'a ni enyi ri ndun mobu ni enyi nwun a nwun, enyi wu nke Onye-nwonnienyi. ⁹ Onwan hain Kraisti gi nwun, nwunguu, rizi ndun: keni o hun uzọ wuru Nna ndi ri ndun le ndi nwunni.

¹⁰ Iyu nwen, ki hain nwan i gi a ma nwene i ime Kraisti ikpe? Ki hain i gi e lelia nwene-i-ime-Kraisti? Enyi ile k'e turu ihun Osolobue n'o kin enyi ikpe. ¹¹ Make ni Ehuhuhonso si,

“Di-nwonnienyi si,
‘Ebe o me ezie ni m ri ndun,
onye owule k'e sekpu ni m;
onu ile k'e ku e ni mme wu Osolobue!’ ”

¹² Ya wu nwan ni, onye owule ime enyi sikọ d'a koni Osolobue k'o don bi.

Emekwole Ni Ibe Unu Dan

¹³ Ya wu, ni enyi mabe ni nwan ibe enyi ikpe. Kama, ni enyi kwademe obi enyi ni enyi ebutokoni nwene enyi ime Kraisti omuma kpogburu mobu bu uke che n'e.

Ndị Rom Isi Nke Mmēnọ:14 35 Ndị Rom Isi Nke Mmisēn:3

¹⁴ Rikē onyē nke Di-nwōnni-ēnyi wụ Jesu, o we m ̄nya ̄hūnma-̄hūnma n'o nwōnni ihien-oriri ̄wūlē rīlēni ̄ochan; kanī omēni ihian e weri ihien-oriri ̄wūlē n'ō rū arū, ya wū nī ̄ rū arū ebe onyē hū rī. ¹⁵ O mē nwan ni ihien y'e ri rī e ye nwēnē i nsongbu, ya wū nī y'a rizi e gi ihien-̄susūo e bi. Egikwōlē ihien-oriri y'e ri tikpō onyē Kraistī nwūnni ̄onwūn! ¹⁶ Kpanchanpūkwo ̄nya, amamgbe ihian a kpō ihien-̄oma i eje-ēfan. ¹⁷ Makēni Alī-eze Osolobue ̄lē ihien-oriri lē ihien-̄orira, kanī obibi Chuku chō, udōn lē ighoghō hūn Mmōn-nsō e ye. ¹⁸ Onyē ̄wūlē rī e gi ̄zōnī e fe Kraistī, ihien onyē hū a sūo Osolobue ̄sūo, ndī ̄zō e kuzi oku ̄ ̄hūnma.

¹⁹ Nī ̄nyi līlīma nwan e mēsonmē ihien ndī hūn e wēhē udōn lē hūn ̄nyi e gi e mē ibe ̄nyi a gha ihun imē okukwe. ²⁰ Egikwōlē ifiri ihien-oriri tikpō ̄rūn Osolobue. Ezioku-ezioku, o nwōnni ihien-oriri rūnī, kanī eje-ihien k'ō wū nī ihian e ri ihien ̄wūlē k'e mē onyē ̄zō dan. ²¹ ̄ ka mma nī y'e erini anū mōbū ra manya mōbū mē ihien ̄zō ̄wūlē hūn k'e mē nwēnē i imē Kraistī dan.

²² Ya wū, ihien ̄wūlē i kweri banyeni ihien ndīnī, ya rī ̄gbata 'yū lē Osolobue. Ngōzi wū nke ndī ahūn ghalēni e gi ihien wē kweri n'ō hūghō mma a ma enwēn wē ikpe. ²³ Kanī, omēni ihian gi obi-ēbūo e ri ihien ̄ rī e ri, ikpe a maguō a, makēni ̄ rīnī e gi okukwe e ri ̄—makēni ihien ̄wūlē ihian mē bū ̄lē okukwe k'o gi mē ̄ wū njo.

Isi Nke Mmisēn

A Chozikwō Nī Orinimma Ndī ̄zō

¹ O furu nī ̄nyi ndī zeni imē okukwe e di ndī zelēni ebe wē nolēni mē ̄hūnma, ̄lē imē ihien a sūo nī ̄nyi. ² Nī ̄nyi e mē ni ihien a sūo ibe ̄nyi hūn k'a rīnī wē mma, kēni ̄nyi hūn ̄zō ̄nyi e gi mē wē sue imē okukwe. ³ Makēni

Ndi Rom Isi Nke Mmisen:4 36 Ndi Rom Isi Nke Mmisen:13

Kraịstị emeḍeni k'ọ sụọ ya lẹ enwẹn ẹ; kama, o meḥu ke Ẹkụkwọ-nsọ dọn ku, ebeḥu wẹ de, si,
“Mkpari hu wẹ kpari i,
mme gi isi buru ẹ.”

⁴ Wẹ de ihien ile wẹ deye ime Ẹhuhuo-nsọ keni wẹ gi ẹ kuzi ẹnyi, keni ẹnyi hun ụzọ gi umẹ hun Ẹkụkwọ-nsọ a gba ẹnyi lezi idin-ndidi wuru ndi nwon olile-nya.

⁵ Osolobue hun e ye ndidi le nkasi-obi, ya yeni onu ẹka e gi obi ohu e bi—k'o furu ime Kraịstị wu Jizosi, ⁶ keni onu ile hun ụzọ gi olu ohu e weheni Osolobue hun wu Nedi Di-nwonnienyi wu Jizosi Kraịstị ogho.

A Nabanhan Ni Ihian Ile

⁷ A nabanhan ni nwan ibe onu ke Kraịstị dọn nabanhan unu, keni unu hun ụzọ e weheni Osolobue ogho. ⁸ Make ni Kraịstị bia d'a runni ndi Ju keni o gho si ni Osolobue wu onye ezioku, ghahani imezu nkwa Osolobue kwe ndi nedi wẹ kani; ⁹ o biazikwo ken'o me ndi ali ndi ozọ wulen ndi Ju ja Osolobue mma make omiken Osolobue. Erira ke wẹ dọn de ẹ ime Ẹhuhuo-nsọ, si,

“Make ufiri ẹ, m k'a ja i mma ebe ndi ali ndi ozọ wulen ndi Ju ri; m k'a bu ni efan i ebụ ija-mma.”

¹⁰ O sizi, “Ndi ali ndi ozọ hun wulen ndi Ju, son ni ndi nke Osolobue ghoghọ.”

¹¹ O sizi, “Ani ndi ozọ ile wulen ndi Ju, ja ni Di-nwonnienyi mma; ali ile, buni n'a ebụ ija-mma.”

¹² Osolobue gizi Azaya si, “Mkpogun Jese k'a puha— Onye ahun hun jenko d'e lihi, kima ndi ali ile; iya ke ndi wulen ndi Ju k'e gi dọn ẹnya.”

¹³ Osolobue, onye hun olile-nya gha ẹka a abia, ya gi ighoghọ le udon ile gbajun unu ke unu dọn ri e gi ẹ e dọn ẹnya. Y'a me ẹ, keni unu nwe olile-nya, nwe ẹ oda-oda, ghahani iken Mmon-nsọ.

Iken Polu Gi E De

¹⁴ Umune m, o weguo m enya ni mma-mma jun ime unu, ni amamihiyen jun ime unu, ni unu k'a sazikwo eka kuzi ibe unu. ¹⁵ Kani, o nwegho ihien ndi m ku ndun-ndun ime ehuhuo-ozini, keni m nyanhanzini unu we. M'e kushi iken make eka Osolobue hun ri ime ndun m, ¹⁶ hun o gi tumem onye a runni Kraist' wu Jizosi ime igunrun ndi ali ndi ozo wuleni ndi Ju. M ri nwan a run ke onye nchuejan ghahani izisonme ozioma Osolobue. M ri a run keni ndi ani ndi ozo hun uzo wuru ihien we ye Osolobue hun Osolobue a nabanhan, oyiye Mmon-nsodon nsod. ¹⁷ Ya wu, o furu nwan ni m'a nyan isi banyeni ihien Jizos' Kraisti gi m run ime ihien Osolobue. ¹⁸ Ekukode m ihien owule kari ihien Kraisti gi m run ime igunrun ndi ali ndi ozo wuleni ndi Ju, hun o gi me we wuru ndi e hume ni Osolobue isi. O gi oku-onu m le ihien m run me e, ¹⁹ le iken o gi ihien-ahima le orun-atumenya kpa, lezi ghahani iken Mmon nke Osolobue—nke wu ni e zichanringuo m ozioma Kraisti ghakwori Jerusalem d'e ru Ilairikom. ²⁰ Ihien m'a chokenme wu ni m'e zi ozioma ebe we keleni nutu efan Kraisti, amangbe m'a tunyezi ebe onye ozo tunmaguu. ²¹ Kama, m ri e me n'oriri ke Ehuhuo-nsodon ku, ni, “Ndi we gwatuleni banyen'e k'a hun; ndi nutuleni banyen'e k'a ghota.”

Polu A Tu Iroto Ijen Rom

²² Ifiri e ke m gileni sa eka bia d'a hun unu ogen ile m gi cho ni m bia.

²³ Kani, hunni o me nwan n'o nwezini ebe hoduni m k'a no run orun azuunni ile bu o mepuguo ahua ole-le-ole m choma ni m bia d'a hun unu, ²⁴ a kwademegu m ni m k'a bia m jenkoni Speni. M bu e obi ni m k'a banhan d'a hun unu m jenkoni, keni unu ye ni m eka m jenkoni ebegu—mme le unu noguu ekere.

Ndi Rom Isi Nke Mmisen:25 38 Ndi Rom Isi Nke Mmisin:2

²⁵ Kani, m jenkọ nwan Jerusalem kikenni d'e yeni ndi nke Osolobue ri ebefu aka. ²⁶ Makeni ndi kwerini risonme Azuun Masedonia le Akaya e wepuhaguo obi, shiapu efotu ndi igbenye ri ime ndi nke Osolobue ri Jerusalem ihien. ²⁷ Uwe gi uche we me ihien. Ezioku-ezioku, o furughu, makeni we gi ndi kwerini ri Jerusalem uguo. Makeni, omeni ndi wulen ndi Ju e songuo uwe wu ndi Ju kerin ngozi ime-mmou we, o furu ni ndi wulen ndi Ju gizi ihien unani we nwe yeni we aka.

²⁸ M runggu ogboni, weguru ihien ile we tu ye we, m k'e jen Speni; m jenkoni a banhan m d'a hun unu. ²⁹ Ogen m'e gi bia d'a hun unu, a maringho m ni m k'e gichanrin ngozi Kraisti bia.

Polu A Rio We Ekpere

³⁰ Umune m, m ri e gi efan Di-nwonna-enyi wu Jizos' Kraisti le ifiri ihien-osusu gha aka Mmon-nso bia hun enyi nwe jenni ibe enyi a rio unu ni unu son m mekenme ekpere, unu a riokenme ni m Osolobue. ³¹ A rio n'a n'o gbapuha m aka ndi kwerileni hun ri ime ali Judia; a rizin'a ni ndi nke Osolobue ri ime obodo Jerusalem nabanhan ihien m jenkọ ebefu d'e meni we, ³² keni m gi ighogho bia d'e kunrun unu, omeni Osolobue a chogho, e son m unu nodiguu—gi e zu iken, ndun a banzi m. ³³ Osolobue, onye hun e ye udon, ya nyeni unu ile. Isee.

Isi Nke Mmisin

Polu Ekele Ndi Ri Ichon-ichon

¹ Nabanhan ni nwee-enyi-okpoho wu Fibi, hun wu onye ohu ime ndi-orun uka ri Senkre; o lala d'a hun onu. ² M si unu gi efan Di-nwonna-enyi nabanhan a k'o furu ni ndi nke Osolobue a nabanhan ihian. Yeni n'e aka owule o

Ndi Rom Isi Nke Mmisin:3 39 Ndi Rom Isi Nke Mmisin:17

chọ nị unu yen'e, makeni ya le enwen e e yepukani ndi bu oda aka, ke mme nwen.

³ Kele ni Prisilia le Akwila, ndi mme le we gba a run orun Kraisti Jizosi. ⁴ Oku m te k'e gbu we. Ele mme suo ri e kele we, ke ndi uka ile risonme ali ndi wuleni ndi Ju ri e kele we. ⁵ Kelezi ni uka hun a no iwe we e zu. Kele ni ezi owu m wu Epenetos. Iya wu onye ibuzo kwere Kraisti ime Azun Eshia. ⁶ Kele ni Meri, hun runkenme ni unu orun. ⁷ Kele ni Andronikos le Junias, ndi Ju ibe m ke we wu, mme le we wi no unon-gan. We wu ndi w'a gbaye ime ndi-ozu puchen, uwe bu m uzọ wuru ndi nke Kraisti.

⁸ Kele ni Amplayatos, ezi nwen m ime Di-nwonnienyi. ⁹ Kele ni Obanos wu onye-orun ibe enyi ime orun Kraisti le ezi owu m wu Stakisi. ¹⁰ Kele ni Apeles, hun we e ku oku e ohunma ime Kraisti. Kele ni ezi-le-ulo Aristobulos. ¹¹ Kele ni Herodion, hun mme le iya wu onye ali ohu. Kele ni ndi hun kwere Di-nwonnienyi ime ezi-le-ulo Nasisos.

¹² Kele ni Traifina le Traifosa, ikpoho ndi hu a runkenmeni Di-nwonnienyi orun. Kele ni ezi owu m wu Pesis, hun runkenmeni Di-nwonnienyi orun. ¹³ Kele ni Rufos, hun Di-nwonnienyi hori, ya le nne e hun e me mme le enwen m ke nwa a ogen ile. ¹⁴ Kele ni Asinkritos le Flegon le Hemis le Patrobas le Hemas le umene ndi ozo ime Kraisti we ile ri ebegu. ¹⁵ Kele ni Filologusu le Julia. Kele ni Neriusu le nwen-e-okpoho. Kele ni Olimpasi le ndi nke Osolobue ile hun we ile ri ebegu.

¹⁶ Dide ni ibe unu ndide ri nsọ.

Ndi uka Kraisti ile e zi ekele.

Oku Ikpazun

¹⁷ Umene m, dodo, o ri aka unu, kpachanpu ni enya make ndi e buhe nkebe, e me okukwe unu uke ebe we n'a kuzi ihien wuleni ezioku ahun ndi kuzini unu kuzi unu.

Ndi Rom Isi Nke Mmisin:18 40 Ndi Rom Isi Nke Mmisin:27

Gba ni ni we oso! ¹⁸ Makeni ndi e me ihien ndini a ri e fe Nna enyi wu Kraisti; kanj we ri e fe efu we le ihien a gunni we. W'e gi onu-oma le oku a suo usuo e dufie ndi marinleni ihien.

¹⁹ Ihian ile a nugu ke unu don ri e hume isi. Ufiri e, efu ri a suo m usuo banyeni unu. M cho ni onu a wu ndi marin ihien ebe ime ihien ri mma ri, unu a wu ndi marinleni ihien ebe ime eje-ihien ri. ²⁰ O bieko Osolobue hun e ye udon a zokpukpo Ekwensu ye okpuru uku unu.

Efoma Di-nwonni-enyi wu Jizosi ya noyeni unu.

²¹ Timoti, hun mme le ya wi a run orun e zi ekele unu, erira ke Lushosi donzi zi ekele unu. Jasin le Sosipata, ndi Ju ibe m, e zizi ekele unu. ²² Mme wu Tetiosi, hun de ekukwo-ozini gi efan Di-nwonni-enyi e zi ekele unu. ²³ Gayosi, hun m ri iwe e, hun uka no iwe e e zu, e zi ekele unu. Erastos, hun e donmeni obodoni eghe le nwene enyi wu Kwotus' e zi ekele onu.

²⁴ [Efoma Di-nwonni-enyi wu Jizos' Kraisti, ya noyeni onu ile. Isee.]

Ojja-mma Ya rini Osolobue!

²⁵ Ojja-mma ya rini Osolobue! Iya wu onye hun k'a saaka gi ihien ri ime oziomani m ri e zi hun we gi a masonme okwa banyeni Jesu Kristi, me unu zekenme. Oziomani le okwani ri e ku oku ihien-mini hun te zueri edei. ²⁶ Kanj, e wepuhagu w'a nwan ifon; we ri nwan e gi ihien ndi-amuma desonme ime Ehuhuo-nsu e me ndi ali ile a marin a; Osolobue hun ri ndun jenin ejen ya ye iwu si we me erira, keni ndi ani ile hun uzọ kweri, gi okweri hu we kweri humen'e isi.

²⁷ Eghẹ, ojja-mma ya rini Osolobue! Osolobue hun ya suo marin ihien ile! Ya rin'a jenin ejen ghahani Jizos' Kraisti! Isee.

Elu Ọhụn: Èkùkwọ-Nsọ (Azụn Ọhụn rịn'a)
Revision of New Testament in Ika

copyright © 2010 Wycliffe

Language: Ika

Translation by: Wycliffe

Ika (ikk) Nigeria

In Nigeria the word Ika is not only the name of the Ika people, but is also used to designate a local government area in the Akwa Ibom State. The Ika people are a sub group of the Igbo people. It is interesting to note that Ika is the name of a town in Croatia is one of the eight Annang local government areas of the local government areas in Akwa Ibom State. An alternative name for the Ika people is Ika-Annang. There appears to be another dialect of Ika that is spoken in Delta State of Nigeria.

Copyright Information

© 2010, Wycliffe. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789037056

Revision

The New Testament

in Ika

© 2010, Wycliffe. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 19 Oct 2021 from source files dated 19 Oct 2021

31b0248e-272a-5dee-8226-bcc00c54d9b1